

Il da tschintg raps è en privel

Mintg'onn vegnan stampads dudesch milliuns da tschintg raps

DA CLAUDIA CADRUVI / ANR

■ **Forsa daventa il da tschintg raps in'ufrenda da las mesiras da spargn. Swissmint, la fabrica da munaida svizra, examine-scha, sch'ins duai renunziar a la stampa da questa munaida manidla.** «I custa fitg bler da stampar ina massa da tschintg raps», di *Kurt Rohrer*, il schef da swissmint. Mintg'onn stampa la swissmint a Berna radund dudesch milliuns da tschintg raps. «Dasperas na dovra ins gea strusch pli il da tschintg», di Rohrer. «Las cassieras fissan schizunt ledas, sche questa munaida svaniss.»

Il da tschintg custa sis raps

I dettia era blers che rimnian a chasa en in truclet ils da tschintg raps. Uschia svaneschia la munaida e na vegnia mai pli duvrada.

La produczion d'in sulet da tschintg raps custia dapli che quai che la munaida valia: numnadamain sis raps.

«Il da diesch raps saja en proporziun pli bunmartgà», di Rohrer. El valia dapli che quai che sia produczion custia. Swissmint stampa radund sis milliuns da diesch raps entaifer in onn, pia ca. la mesadad dals da tschintg raps.

In'ufrenda raschunaivla

«En connex cun las mesiras da spargn da la confederaziun, ponderain nus, tge che la swissmint po contribuir», declera Rohrer. Per il schef da la munaida svizra èsi cler ch'il da tschintg raps fiss in'ufrenda da spargn raschunaivla.

Quest onn vegn la swissmint perquai anc a far ina dumonda

per abolir il da tschintg raps. Da decider ha il cussegl federal. Sche lez approvescha la dumonda, vegni dentant anc a cuzzar dus u trais onns, fin ch'il da tschintg raps svanescha per adina da la fiera monetara svizra.

Pertge è il da tschintg mellen?

Pli baud traglischava il da tschintg raps anc en color d'argient, ed el consistiva sco tsel-la munaida d'ina lega (maschaida) dad aluminium e bronz. Perquai che questa lega custava memia bler, han ins decidì da far il da tschintg cun ina lega d'arom e da nichel. Questa lega è pli bunmartgada. Persuenter traglischava il da tschintg sco sch'el fiss dad aur. E perquai fa il pli pitschen bunamain la pli bella parada en las bursas svizras. Almain anc uss.



Forsa svaneschan ils pitschens «marenghins» ord las bursas svizras: Da producir in da tschintg raps custa numnadamain dapli che quai che la munaida vala.